

Listovi...

Listovi gračaničkog kalendara od 1.11.1999. do 10. 5. 2000.

1.11.1999.

Kako se zaposliti - teško preteško pitanje

Prema zvaničnoj statistici, na području Federacije Bosne i Hercegovine, trenutno je evidentirano 267.000 nezaposlenih osoba i 64.000 onih koji su na takozvanom čekanju. Na gračaničkoj opštini posao čeka 8.300 lica - sa "tendencijom daljeg povećanja..." Sa povećanjem boja privatiziranih firmi, povećavat će se i broj nezaposlenih. Skoro će ih biti koliko i zaposlenih. Sa škola i fakulteta dolaze mladi i postavljaju pitanje iz gornjeg naslova - na koje će odgovor još dugo čekati. Ako ga uopšte u ovoj zemlji ima ko dati.

6.11.1999.

Otvoren izbjeglički prihvatni centar Duje

...na istoimenom lokalitetu u blizini Klokotnice (sadašnja opština Doboj Istok), služiti će za prihvatanje prognanika-povratnika iz Makedonije i Turske. Centar raspolaže kompletnom infrastrukturom i može jednovremeno zbrinuti više od 300 osoba. Centar je izgradila humanitarna organizacija Emaus internacional iz Francuske, koja je, inače, duže vremena prisutna na području opštine Gračanica i Doboj Istok.

11.11.1999.

Bilans obnove u Stjepan Polju - vrijedan pažnje

U novi vodovod uloženo je oko 250.000 KM, u obnovu ratom oštećene škole oko 200.000 KM, u mahali Dedići opremljen je dio poslovnog prostora za potrebe mjesne organizacije ratnih vojnih invalida, sanirane su ratne štete na Domu kulture, izgrađeno je šehidsko mezarje, urađen je novi urbanistički plan za mahalalu Polje itd. Veliku pomoć pružile su humanitarne organizacije, ali da nije bilo inicijative i angažovanja samih

"Listao":
Omer Hamzić

Stjepopoljaca, ovaj bilans bio bi, vjerovatno, manji. Samo za izgradnju vodovoda prikupili su 34.000 KM vlastitog učešća.

Na redu je izgradnja Zanatskog centra, sanacija i izgradnja poljskih puteva itd.

Stjepopoljci "idu dalje".

24.11.1999.

Suho Polje - još jedan most na Spreči

Nakon izgradnje i puštanja u saobraćaj mosta na Spreči kod Karanovca, stabilizacijske snage SFOR-a podigle su sličan most kod Suhog Polja, koji je, takođe srušen tokom rata. Suho Polje je jedino bošnjačko naselje s lijeve strane Spreče na tom dijelu Ozrena. Njegove žitelje Ozrenici su protjerali krajem aprila i početkom maja 1992. godine - koji se još uvijek nisu vratili svojim kućama.

I jedan i drugi most, kako je rečeno prilikom njihovog otvaranja, ponovo će povezati ljude s obje obale Spreče, ubrzati povratak izbjeglica, te doprinijeti daljoj normalizaciji opštih prilika na ovom području.

26.11.1999.

Opštinsko vijeće Gračanica - pohvale načelniku Muhamedu Ibrahimoviću

Izrečene su prilikom razmatranja i usvajanja redovnog izvještaja o realizaciji programa rada opštinskog načelnika za prvih devet mjeseci ove godine. Pozitivne ocjene baziraju se na činjenici da je Gračanica jedna od najstabilnijih opština ne samo na Kantonu već i šire, da je ostvarila izuzetne rezultate na planu obnove i razvoja, dinamiziranju privrede, posebno privatnog sektora, međuentitetskoj saradnji itd. U 1999. godini planirana su ulaganja u razne projekte obnove i razvoja u iznosu od 11,5 miliona DM, za 9 mjeseci realizovano je preko 80% - sve u cilju normalizuje opštih prilika i poboljšanja kvaliteta življenja na ovom području.

Još jedan plus Ibrahimoviću - i od pozicije i od opozicije.

30.11.1999.

Gračanica - Malešići - nikad više kamena, nikad gori put

Otvaranjem dva, odnosno tri kamenoloma u klisuri Driječe na ulazu u Malešiće, zauvijek je upropašten prelijepi izgled čitavog ovog krajolika koji je nekada privlačio pažnju brojnih ljubitelja prirode, pa i izletnika koji su dolazili da posjete "Šupli kamen" i uživaju u šetnji pored uređenog korita pomenute rječice. Još u nekim spisima iz doba Austro-Ugarske (koja je izgradila ovaj put, oko 1903), lokalitet Sklop na domak Malešića spominje se kao izletišta. Uskoro će, nažalost, biti jedino pogodan za snimanje filmova strave i užasa. U taj ambijent uklapa se i austrijska cesta, koja nikad nije bila gora još od "ćesara", a kamena na sve strane... i ekologa i drugih boraca za narod, za bolje sutra...

30.11.1999.

Report iz prosvjete - stanje skoro, pa normalno

Na gračaničkoj opštini radi (uglavnom u dvije smjene) 11 osnovnih (osam četvororazrednih), dvije srednje (gimnazija i mješovita) i jedna osnovna muzička škola. Brojno stanje: 6.758 u osnovnim i 2.382 učenika u srednjim školama. Stručna zastupljenost nastave: 82% u osnovnim i 97% u srednjim školama. Uspjeh: iznad prosjeka Tuzlanskog kantona. Prva osnovna i Mješovita srednja, u prošloj školskoj godini svaka u svojoj kategoriji prve na Tuzlanskom kantonu. Uslovi da rad znatno poboljšani. Kažu, može i bolje...

30.11.1999.

Nove službe u gračaničkom Domu zdravlja

Otvorena je gastroenterološka ambulanta u kojoj radi ljekar specijalista - internista i urolog, a počela je sa radom i citoskopija, za čiji se nalaz do sada moralo "klapiti" do Tuzle. Ova "kuća zdravlja" ide svome glavnom cilju: otvaranje opšte bolnice u Gračanici.

6.1.2000.

Grapska čeka proljeće povratka

Prije rata bilo je to bogato i razvijeno bošnjačko selo sa 3.230 stanovnika. Porušeno je i spaljeno 10. maja 1992. godine, žene, djeca i starci protjerani, sposobni muškarci odvedeni u logore, mnogi pobijeni na kućnom pragu... Krvavi maj Grapske označio je početak srpske agresije i rata u ovom kraju...

U ovo selo život se polahko vraća. Započeta je popravka porušenih i opljačkanih kuća. Sedam je potpuno završeno, pet je u izgradnji, 320 je očišćeno i pripremljeno za sanaciju, ostale će doći na red čim vremenski uslovi dozvole. I pored hladnoće, ovdje se neprekidno radi, popravlja, sređuje. Sa komšijama Srbima nije bilo većih problema, izjavio je za Radio Gračanicu Safet Buljubašić, predsjednik Odbora za povratak u Grapsku. Čeka se proljeće povratka.

9.1.2000.

"Nek mirišu avlije" - bajramski program učenika Mješovite srednje škole u Gračanici

...izveden u prepunoj sali Doma kulture u Gračanici, oduševio je gračaničku publiku, koja je nakon dužeg vremena imala priliku da vidi cjelovečernju pozorišnu predstavu "domaće proizvodnje". Mladi glumci ove škole izveli su dramu "Hamdibeg" (prema istoimenoj priči Harisa Silajdžića), a nastupili su i pjevači amateri, pisci, folklor i orkestar škole. Mladi talenti, na čelu sa svojim profesorom Milisavom Mikićem nagrađeni su zaslužnim aplauzom.

Po ko zna koji put vidjelo se da Gračanica ima i talenata i publike. Samo treba i jedne i druge "probuditi" - ali nije do njih...

10.1.2000.

Izložba slika Nihada Hadžihasanovića - Gradski restoran "Galerija" Gračanica

Ovaj likovni pedagog i slikar (rođen u Derventi 1938. godine) do sada je imao 30 samostalnih i 57 kolektivnih izložbi. Izlagao je u mnogim gradovima Bosne i Hercegovine. Od

aprila 1996. godine živi kao prognanik u Gračanici i sa vrlo skromnim mogućnostima i dalje slika, izlaže i radi, te tako daje svoj doprinos obogaćivanju kulturnog života u ovom gradu. Jedan je od inicijatora za oživljavanje rada Kulturno-umjetničkog društva "Adem Alić" u Gračanici. O njegovom stvaralaštvu ovdašnji slikar Hajrudin Junuzović zapisao je sljedeće impresije: "Dokumentarnost je jedna od glavnih preokupacija Hadžihasanovićeva slikarstva. Kroz njegove slike teče historija. Ona se slijeva sa starih fasada, tiho izlazi kroz odškrinuta željezna vrata sa halkama i prelijeva se po trošnom stepeništu. Demiri na prozorima čuvaju intimu i propuštaju samo zlatne zrake sunca. Sve je u patini koju je šteta obrisati. I lampa škilji, ali nije ugašena. U njegovom slikarstvu ima puno stare Bosne. Sve ovo postiže svojim majstorskim prepoznatljivim rukopisom..."

11.1.2000.

Otvoreno odjeljenje psihijatrije u Domu zdravlja Gračanica

Opremu i neophodne aparate za ovo odjeljenje obezbijedila je švedska humanitarna organizacija UNGA LIV i Visoki saudijski komitet - Odjel za medicinsko snabdijevanje u Sarajevu. Dom zdravlja je vlastitim sredstvima adaptirao prostor u koji je smješteno deset kreveta za bolesnike. Prema informaciji Radio Gračanice, prve pacijente ovo odjeljenje primilo je krajem prošle, 1999. godine - i vjerovatno će imati pune ruke posla... "na ovakvom vaktu i zemanu".

17.1.2000.

Otvoren most Karuše, na Ušću, kod Doboja

To je jedan od najznačajnijih objekata na magistralnom putu M - 17, koji je podignut na poprištu teških sukoba u minulom ratu tokom kojih je srušen stari most i prekinuta svaka komunikacija između dvije obale. Poslije rata vojnici SFOR-a na tom mjestu montirali su metalni most, čija je propusna moć bila ograničena, pa je često dolazilo do "začepljenja" i dugotrajnih čekanja na prelazak s jedne na drugu obalu.

Gradnja novog mosta započeta je još "daleke" 1989. godine, ali sve je prekinuo rat...

Za nepunih 16 mjeseci most su izgradili radnici ŽGP Doboj "koji su, kako piše "Oslobođenje", uz pomoć poslovnih partnera implementirali donaciju Evropske unije u vrijednosti od oko 5 miliona maraka." Most je dugačak 236 metara, u njegovu konstrukciju ugrađeno je 2.650 kubnih metara betona, 22.320 tona razne armature, više od 7.000 kubnih metara šljunka i više od 3.200 tona asfalt betona.

U prisustvu mnogih gostiju most su simboličnim presijecanjem vrpce otvorili Živko Radišić, član Predsjedništva Bosne i Hercegovine i Hans Krečmer, ambasador Evropske unije u Bosni i Hercegovini. Zvanično - prvi preko mosta vozilom je prošao Jovo Aleksić, VKV vozač dobojskog ŽGP.

"Sad je nama Sarajevo mnogo bliže..."

18.1.2000.

Certifikati, velika prevara, magla, dim...

Ovih dana prodaju se po cijeni od 1,5 - 3%, na ulici, na pijaci, legalno, ilegalno, svakako - putem oglasa i razglasa. Za nekih stotinjak maraka realne vrijednosti tog papira prodaje se nečiji radni vijek, sve što je stvorio i stvarao... bagatela, muka, razočarenje. Za preprodaju tih papira, u Gračanici su se već afirmisali dokazani "specijalci". A kupci - budući tajkuni, ljudi s parama koji će kupiti - nas... Najružnija i najtužnija faza privatizacije, reče Hamza Bakšić na talasu "Slobodne Evrope".

25.1.2000.

"Olimp" se oporavlja

Oko 400 radnika radi na lohn poslovima za njemačku firmu "Gebruder" i partnere iz Slovenije "Top-tes" i "Elkroj" - ljetna konfekcija (prsluci, hlače, jakne). Zараđuju od 200 do 250 KM, imaju organizovan prijevoz i topli obrok - i to je sve što im "Olimp", objektivno, u ovim uslovima može obezbijediti, kaže Hazim Hasinović novi direktor ove firme. Poslovi za 2000. godinu ugovaraju se u aprilu (sezona jesen-zima). Nakon

toga, bit će, valjda, bolje - nadaju se gračanički konfeksionari - a tu je i privatizacija.

17.2.2000.

Izbor najuspješnijih sportista opštine Gračanica za 1999.

...obavljen je ove godine u organizaciji noformiranog Opštinskog sportskog saveza, društvene asocijacije koja okuplja sve sportske klubove u Gračanici. U konkurenciji sportskih kolektiva najbolji je malonogometni klub "Kaskada", visokopozicionirana ekipa u elitnom državnom takmičenju. U pojedinačnoj konkurenciji najuspješnijim su proglašeni: sportista godine Osmić Adnan (F.K. "Gračanica"), sportašica godine Alisa Sarajlić (K.K. "Bošnjak"), najuspješniji trener Ekrem Kamarić (K.K. "Gračanica 70"), najuspješniji sportski radnik Halil Hadžić (K.K. "Bošnjak"). U konkurenciji ratnih vojnih invalida-sportista, najuspješnijim je proglašen Venad Huskić teniser iz Miričine.

Zaključak: grad koji ima takve sportiste ne treba da brine za svoju sportsku budućnost. A sportska dvorana...? Više od pitanja.

18.1.2000.

Nove trafostanice, bolja struja

Puštanjem u pogon velikog trafoa na Korića Hanu (u blizini stambene zgrade "Vegafruta") i trafoa manjeg kapaciteta u blizini "Grafofaka" obezbjeđuje se mnogo kvalitetnije snabdijevanje električnom energijom proizvodnih pogona i domaćinstava u tom dijelu Gračanice. U rekonstrukciju i izgradnju kapitalnih elektro-energetskih objekata na području Gračanice tokom prošle godine uloženo je blizu milion DM. "Idemo dalje", obećao odgovorni iz Elektro-distribucije - i odoše.

1.2.2000.

Ni krediti nisu više što su nekad bili

To su osjetili mnogi "biznismeni" kako u Gračanici, tako i širom BiH, koji "poletiše" za kreditima USAID-a i drugih međunarodnih kreditora i agencija, počesto bez ozbiljnijih analiza i

procjena mogućnosti njihovog vraćanja. U posao su ulazili sa puno entuzijazma i još više voluntarizma - što im se sada "objija" o glavu. Strani kreditori nemaju milosti kao oni iz vremena socijalizma. "Aktiviraju" se hipoteke, idu prodaje založenih nekretnina, novine su pune oglasa "o preduzimanju pravnih radnji", sudovi imaju pune ruke posla... Na "dobošu" je imovina "Feringa", "MMR", i još nekih gračaničkih firmi.

Za podsticaj poljoprivredne proizvodnje preko 250 poljoprivrednih proizvođača na gračaničkoj opštini uzelo je takozvane mini-kredite iz kojih su pod vrlo povoljnim uslovima nabavili poljoprivrednu mehanizaciju i stoku. Nakon toga izbjegavaju i odugovlače izmirenje svojih obaveza i tako onemogućavaju stvaranje uslova za dalje kreditiranje poljoprivredne proizvodnje, jer se radi o takozvanim revolving kreditnim linijama. Krajem prošle godine blizu 50% bilo je na spisku "zaboravnih" - protiv kojih kreditori preduzimaju "učinkovite" mjere - bez "oprostu" kao nekad.

8.2.2000.

Šta i kako savjetovati lokalnu privredu

Na to pitanje odgovor će tražiti Savjet za privredu Opštine Gračanica koji je konstituisan u sljedećem sastavu: Hajrudin Čudić, direktor Štamparije "Grin" (predsjednik Savjeta), Faruk Širbegović, vlasnik Komp. "Širbegović" (zamjenik predsjednika), Faruk Mujić, direktor "Fortune", Ramiz Grapkić, direktor "Jadrine", Reuf Sokolović, predsjednik Udruženja peradara, Muharem Salihbašić, direktor "Vega fruit", Mustafa Tinjić, direktor "Megatija", Jakub Muftić, privatni poduzetnik, Mehmed Hadžiaganović, direktor "Bosne", Kemal Helić, direktor "Parka" i Hasan Mostarlić, šef Službe za budžet, finansije i poduzetništvo Opštine Gračanica i direktor D.D. "Terme" Gračanica. Savjet će, kako je rečeno, promovisati interese privrede pred državnim organima, afirmisati poslovnu etiku, jednak pristup svim preduzećima bez obzira na oblik vlasništva, pomagati u radu Opštinskog vijeća i načelnika, promovisati uspješne privrednike itd. U svakom slučaju, pitanje iz naslova ove crtice ostaje otvoreno, a ima i dodatno: ko će savjetovati tolike direktore?

29.2.2000.

"Mrtve ribe opet Spreča nosi..."

To je samo usamljeni vapaj Fikreta Čurića i Mehmedalije Beganovića, dvojice entuzijasta iz ovdašnjeg Sportskog ribolovnog društva. Mnogo će vode proteći Sprečom dok ih čuje onaj koji truje... Nažalost, to više nije vijest.

29.2.2000.

"Gračanički glasnik" - predstavljena "osmica", uz predavanje "Crkva bosanska i bosanski muslimani"

U solidno "popunjenoj" Dershani Osman-kapetanove medrese o Časopisu kao projektu i osmom broju posebno laskave pohvale iznio je predratni i ratni rektor Sarajevskog univerziteta prof. dr. Jusuf Mulić, koji je potom na vrlo originalan i dopadljiv način elaborirao navedenu temu. Cilj je bio da se "uživo" baci bar malo svjetla na tu našu srednjovjekovnu Bosnu, koja je imala sve atribute nezavisne i suverene države kao i ostale tadašnje evropske države - pa naravno i svoju autentičnu - crkvu bosansku. Šta je bilo sa "dobrim Bošnjanima" - pristalicama te crkve nakon propasti bosanskog kraljevstva i dolaska Turaka u ove krajeve 1463. godine? Profesor Mulić je uspio odgovoriti na to dosta intrigantno pitanje - i osvojiti simpatije prisutnih svojim izuzetnim poznavanjem materije i jednostavnošću sa kojom je izlagao svoju argumentaciju. "Glasnik" se tako na najbolji način uključio u obilježavanje 1. marta, Dana nezavisnosti Bosne i Hercegovine, koji se, nažalost, praznuje samo na jednom njenom dijelu, zna se kojem.

4.3.2000.

"Preporod" u Gračanici - ponovo ispočetka

Ova opštinska asocijacija kulture formirana je 1991. godine sa dosta pompe, ambicija i obećanja da će "preporoditi" kulturu u ovoj čaršiji. Zbog poznatih okolnosti i zbog odlaska iz Gračanice nekih njenih istaknutih članova, "kad je Bosni bilo najteže", od tih obećanja nije bilo ništa. U međuvremenu "Preporod" je pokušavao da oživi vječiti gračanički entuzijasta u oblasti

kulture rahm. Dževad Sarajlić, ali ni njemu to nije pošlo za rukom iako je imao podršku - na riječima. Bilo je, dakle, previše politike i premalo para.

Sada "Preporod" formiraše "neki novi klinici". Održaše i osnivačku skupštinu, izabraše rukovodstvo - bez pompe i provincijalnog "glam-ura" kao nekad. Za predsjednika izabraše ovdjašnjeg mladahnog pjesnika Hasana Puškara, kojem takođe ne manjka entuzijazma. Valjda će biti i rezultata.

18.3.2000.

Kamen temeljac za osnovnu školu u Pribavi

...svečano su položili načelnik opštine Gračanica Muhamed Ibrahimović i aktuelna ministrica obrazovanja, nauke, kulture i sporta u Vladi Tuzlanskog kantona prof. dr. Nihada Latifagić. Bila je to velika bajramska radost za sve Pribavljanje, a posebno za stotinjak daka koji svakodnevno pješače 3-4 kilometra do škole u Gračanici. Najkasnije do početka sljedeće školske godine Pribava bi mogla imati novu školu sa pet učionica i školskom kuhinjom - ukoliko, naravno, kamen temeljac ne zaraste u travu.

20.3.2000.

Ni rano povrće "nema se računa sijati"

Brojna naselja duž magistralnog puta Doboj-Tuzla u Sprečkom polju, a posebno Donja Lohinja i Pribava na području gračaničke i Velika i Mala Brijesnica na području opštine Doboj Istok bila su svojevremeno poznata po proizvodnji ranog povrća i sadnog materijala, takozvane rasade. Ovog proljeća platenici i tople lijehe - prava su rijetkost - jer se više ni taj posao ovdje ne isplati. I ovo je, kako piše Hasan Čalić, u "Dnevnom avazu" još jedan u nizu primjera propadanja domaće proizvodnje, koja je izložena nelojalnoj konkurenciji sa "Arizona", odnosno razornom dejstvu otvorenih granica, šverca i mešetarenja. To je, ustvari, naličje katastrofalne politike aktuelne vlasti u oblasti poljoprivredne proizvodnje.

"Domaće je najbolje" - al' "u panjevima".

21.3.2000.

Nova ambulanta u Donjoj Lohinji

Objekat je obezbijedila opština i mjesna zajednica, a opremu i inventar Dom zdravlja iz Gračanice. U njoj će svakodnevno raditi medicinski tehničar, a jednom sedmično i ljekar opšte prakse, za početak...

22.3.2000.

"Krpež - trpež"

U posljednje vrijeme u Bosni i Hercegovinu, pa i u Gračanicu stižu konvoji starih automobila svih mogućih i nemogućih svjetskih proizvođača, te kamioni i šleperi starih i polovinih stvari - od namještaja, tepiha, bijele tehnike, do svih vrsta garderobe, posuda, dječjih igračaka. Izbor je više nego dobar - a sve jeftino - do džabe: očuvan rezbaren regal, kuhinja ili dnevna soba od 600-700 KM, tepisi 50 KM, košulje od 2-5 KM, cipele 5 KM, sakoi od 5-10 KM, suknje 4 KM... Prvoklasna strana roba prilagođena domaćem standardu. To je zasluga domaćih trgovaca-uvoznika, kojim za sada posao cvate, a mi postajemo smetlište Evrope. Sada imamo više registrovanih automobila nego zaposlenih radnika, nosimo se - "europski, svi siti i zadovoljni".

22.3.2000.

Spreča potopila karanovački most

Na svečanosti povodom puštanja u saobraćaj karanovačkog mosta, 23.7.1999. godine, (kojeg su izgradili pripadnici NORD bataljona SFOR-a) niko nije mogao ni slutiti da će ta dosta skupa "na Spreči ćuprija" (koštala oko 4,5 miliona DM) biti tako kratkog vijeka. Prvi veći "povodanj" umalo nije iz temelja "iščupao" čitavu metalnu konstrukciju mosta, pa su je morali hitno uklanjati oni koji su je i postavili. "Fušeraj" prilikom gradnje ili nešto drugo...? Nadležni međunarodni faktori postavljaju pitanje cijene mosta i količine uložnih "demokratskih" maraka u taj projekat. I pripremaju gradnju novog betonskog mosta na istom mjestu - već u aprilu, ako ne bude drugačije. Dotle će se, valjda, i Spreča razbistriti.



Most kod Karanovca, ratna slika.

24.3.2000.

Odluka o osnivanju Opšte bolnice u Gračanici

Pošto su se stekli svi potrebni zakonski, a prije toga kadrovski i medicinsko-tehnički uslovi, Opštinsko vijeće Gračanica donijelo je Odluku o osnivanju Opšte bolnice u Gračanici, koja je ponijela ime poznatog Gračanlije, rahm. Dr Mustafe Beganovića. Bolnica se osniva za specijalističko-konsultativno liječenje, urgentnu medicinu, laboratorijsku, radiološku i drugu dijagnostiku i snabdijevanje lijekovima, a pružat će stacionarnu sekundarnu zdravstvenu zaštitu stanovništvu koje gravitira ovom području iz sljedećih medicinskih oblasti: interne medicine, pedijatrije, ginekologije, opšte hirurgije, neuropsihijatrije, te polikliničke i specijalističko-konsultativne zdravstvene zaštite iz svih specijalnosti. Opšta bolnica u Gračanici prva je medicinska ustanova ove vrste na Tuzlanskom kantonu. Osnivanje ove zdravstvene ustanove rezultat je višegodišnjih napora svih zaposlenih zdravstvenih radnika Doma zdravlja u Gračanici na čelu sa dr. Muamerom Mujčinagićem, koji ima posebne zasluge u ovom velikom poduhvatu. Oko projekta Opšte bolnice uspio je okupiti blizu stotinu humanitarnih i drugih organizacija, koje su u ovu bolnicu uložile više od 4 miliona DM. Uspio je - i kao liječnik i kao direktor i kao

organizator. U to su se uvjerili i opštinski vijećnici neposredno prije donošenja ove, za gračaničko zdravstvo, historijske odluke.

25.3.2000.

Nova trafostanica u Babićima

Instalirana je u mahali Borici, tako da će oko 80 domaćinstava te mahale imati mnogo bolji napon nego do sada. Trafostanica je poklon međunarodnih donatora, dok je priključni dalekovod i niskonaponsku mrežu obezbijedila Elektro distribucija. Valjda je to početak "neoelektrifikacije" nekoliko sela "ispod sijedog krša", koja odavno kubure sa strujom?

28.3.2000.

Prve presude u slučaju "Vikalo i ostali"

Sudskom presudom "da je kriv" (postupak je vodila predsjedavajuća Velikog vijeća Općinskog suda u Tuzli, sudija Dijana Milić) okončano je višemjesečno suđenje, bivšem premijeru Vlade Tuzlanskog kantona, Gračanliji, Hazimu Vikalu i nekim njegovim najbližim saradnicima, koje je izazvalo ne mali politički potres na Tuzlanskom kantonu i "široj okolini". Vikalo je osuđen na dvije godine i dva mjeseca zatvora, drugooptuženi i ostali na manje vremenske kazne. Osuđen je za

zloupotrebu položaja: (1) u davanju pozajmica privrednim subjektima, (2) u nabavci putničkih automobila za potrebe kantonalnog MUP-a i drugih kantonalnih službi - 44 "Golfa", dva sanitetska i jednog "Audija" i (3) u postupku nabavke boja za farbanje i krečenje škola na TK. Nije dokazano da je u ovim poslovima stekao ličnu imovinsku korist, što mu je uzeto kao olakšavajuća okolnost. Ova presuda nije izazvala veliko iznenađenje u Gračanici, kako službenoj tako i onoj - čaršijskoj. Jedni smatraju da ovaj bivši ratni predsjednik i načelnik Gračanice nije uradio ništa što, u manjoj ili većoj mjeri, nije radila ili uradila i većina državnih činovnika u zadnjih desetak godina u BiH, drugi pak misle da je dobro prošao. Možda su u pravu i oni koji sve ovo oko "Vikala i saradnika" kvalifikuju kao politički obračun unutar SDA "vrhuške". Po svemu sudeći, Vikalo će u zatvor "zbog toga što je bio funkcioner u jednom potpuno pogrešno postavljenom sistemu", kojem je i sam tako revnosno služio.

Vikalo i njegovi branioci od početka sve to kvalifikuju kao zavjeru koja se "protiv korupcije lomi na nevinim ljudima" - i najavljuju žalbu. Slijedi dalji postupak koji će, vjerovatno biti više od igre...

31.3.2000.

Otvorena ambulanta u Vranovićima

...kao 14. na gračaničkoj opštini u kojoj će svakodnevno raditi jedan medicinski tehničar, a povremeno ljekari opšte prakse i specijalisti. Ambulanta je rezultat zajedničke aktivnosti vrijednih ljudi ovog udaljenog gračaničkog sela, Doma zdravlja i opštine Gračanica. Time se zaokružuje mreža primarne zdravstvene zaštite na opštini.

6.4.2000.

... i zubna ambulanta u Mješovitoj srednjoj školi u Gračanici

Kao i već postojeća opšta ambulanta i stomatološka će biti u funkciji zaštite zdravlja svih gračaničkih srednjoškolaca. Đacima nedavno

otvorene srednje stomatološke služit će ujedno i kao kabinet praktične nastave. To je plod uspješne saradnje Doma zdravlja i Mješovite srednje škole u Gračanici. Dom zdravlja je putem donacija obezbijedio opremu, a škola prostor. Mnogi "bijeli mantili" iz ove škole naći će zaposlenje u Opštoj bolnici... koja se, kao je rečeno, direktno oslanja na ovaj pomladak i - zato ne treba da brine za svoju budućnost.

8.4.2000.

Općinski izbori 2.000 - "Glasajte za promjene"

To je slogan pod kojim su provedeni ovogodišnji prvi izbori u ovom mileniju i drugi lokalni izbori u Bosni i Hercegovini poslije potpisivanja Dejtonskog sporazuma. Državljeni Bosne i Hercegovine biraju nove predstavnike u opštinska vijeća, odnosno skupštine opština (u RS). Više od 21.000 kandidata u Bosni i Hercegovini kandidovalo se na listama 68 političkih stranaka, 7 koalicija i manji broj nezavisnih kandidata. Glasanje na oko 3.500 biračkih mjesta nadzirao je OSCE-a, pod čijom kontrolom je i ovog puta brojanje glasova i implementacija izbora.

Jedna od najvažnijih promjena u Pravilima i propisima za Opštinske izbore 2000. godine je usvajanje otvorene liste po sistemu proporcionalne zastupljenosti. Sistem otvorene liste omogućio je građanima da glasaju i za pojedince na listi kandidata, a ne samo za stranku, koaliciju ili listu nezavisnih kandidata.


Za naklonost birača na području opštine Gračanica ovoga puta natjecalo se 12 političkih stranaka i jedna koalicija: Socijaldemokratska partija BiH, Stranka za BiH, Liberalno-gradanska koalicija BiH (Liberali BiH, Gradanska demokratska stranka), Demokratska stranka penzionera, Stranka demokratske akcije, Kongresna narodna stranka zaštite ljudskih prava boraca i građana - pravde i morala BiH, Liberalno-bošnjačka organizacija BiH, Partija pravog puta BiH, Nova Bosna, Bosanskohercegovačka patriot-ska stranka, Muslimanska bošnjačka organizacija BiH, Radnička demokratska partija BiH i BOSS - Bosanska stranka.

Glasalo se na 36 "redovnih" glasačkih mjesta i 6 za takozvano "glasanje u odsustvu" (izbjeglice). Od ukupno 27.654 upisana birača, na izbore je izašlo i redovno glasalo (na potvrđenim glasačkim listićima) 19.963 ili 72,2%. Zajedno sa 1.036 birača na nepotvrđenim glasačkim listićima (birači koji se nisu mogli pronaći na redovnim biračkim spiskovima), na glasanje je izašlo 76%, od ukupnog broja upisanih birača, što se u ovdašnjoj Lokalnoj izbornoj komisiji smatra zadovoljavajućim rezultatom. Osim početne gužve sa biračkim spiskovima, sve ostalo oko glasanja na području opštine proteklo je u najboljem redu. I ovoga puta punoljetni građani opštine Gračanica "zaradili su" čistu peticu.

10.4.1999.

Gračanički "Fering" - promocija novih proizvoda

Bila je to mala sajamska izložba koju je ova ugledna gračanička firma organizovala u svom vlastitom krugu. Centralno mjesto na ovoj zanimljivoj četverodnevnoj izložbi imale su dvije automatske dizalice sa potpunim hidrauličkim otvaranjem: AF 27 S i AF 32 S. Riječ je o hit proizvodu na evropskom tržištu, kojeg "Fering" već izvozi u Republiku Irsku. Osim navedenih dizalica, izloženi su i sljedeći proizvodi sa znakom "Feringa": dizalica Turbo 12, mosna dizalica, mješalice za beton kapaciteta 300 i 180 litara, platforma za repetitor Vlašić, skele, kofe, podupirači i alati za građevinarstvo. Ponovo je predstavljen i specijalni elektromotor sa beskontaktnom kočnicom koji se proizvodi samo



na još dva mjesta u Evropi. Prema ocjeni Seada Jahića, inženjera "Feringa", izložba je postigla svoj cilj. Posjeta je bila zadovoljavajuća imajući u vidu ukupno okruženje i aktuelnu sliku domaće privrede na kojoj ima više tamnih nego svijetlih tonova.

18.4.2000.

Drugarski je život bio - posljednja sjednica Opštinskog vijeća starog saziva

Budući da zbog opšte predizborne "frke" nisu mogli odraditi neke redovne poslove, članovi Opštinskog vijeća dosadašnjeg saziva održali su svoju posljednju redovnu sjednicu u ovom mandatu, usvojili Odluku o izvršenju Budžeta, o osnivanju Opštinskog štaba civilne zaštite, te još nekoliko prijedloga i rješenja koja nisu mogla čekati konstituisanje novog Vijeća. Za uspomenu i dugo sjećanje dobili su po jedan ručni sat da bi "valjda konačno vidjeli koliko je sati".

P.S. bilježimo imena "odlazećih". Iz SDA: Avdić Galib (predsjednik Vijeća), Jukan Jasmin, Smajlović Aziz, Džinić Abdurahman, Nurić Rešad, Šestan Muhibija, Helić Kemal, Delić Vehid, Subašić Sulejman, Zahirović Davud, Duraković Hadžib, Musić Smail, Džafić Husein, Nurikić Omer, Alić Hajrudin (15 mandata); iz S BiH: Šuša Fikret, Salihbašić Muhamed, Salihbašić Šehzada i Moralić Nedim (4 mandata); iz SDP: Alić Midhat (dopredsjednik Vijeća), Čaušević Sead, Šaković Senahid, Bravić Amira, Kruškić Mirsad, Helić Mirsad, Selimović Muhamed i Čolić Dino (8 mandata); iz Liberala BiH: Basić Vezir; iz GDS: Mujkić Atif i iz BOSS: Žunić Jasmin. Sekretar Vijeća je Zehra Kovačević.

18.4.2000.

Izašao treći "Školarac" Druge osnovne škole u Gračanici

Riječ je o javnom glasilu koje "prave" učenici i nastavnici Druge osnovne škole. List izlazi dva puta godišnje u tiražu od 1.000 primjeraka. Uređuju ga učenici i nastavnici Škole, koji i čine Redakciju lista: Ibrahim Huskanović, Abida Salihbašić, Ismet Jalović, Jasminka Duraković, Muhamed Salkić i Fadil Buljubašić. Treći broj

sadrži niz kvalitetnih priloga iz života i rada škole, te zapažene radove članova literarne i likovne sekcije. Sudeći po kvalitetu tih radova, ni "Gračanički glasnik" ne bi trebalo da brine za svoje buduće saradnike.

20.4.2000.

Opštinski izbori 2000 - SDP apsolutni pobjednik na gračaničkoj opštini

Nezvanični rezultati Privremene izborne komisije potvrdili su ono što je već bilo poznato: od ukupno 19.267 važećih glasova, povjerenje SDP poklonilo je 52,7%. To je rezultat koji nisu očekivali ni najveći optimisti unutar ove opozicione stranke, ali ni najveći pesimisti SDA. Globalnim grijehovima SDA teško je objasniti njezin potpuni debakl na području gračaničke opštine, lista lokalnih grijehova vjerovatno je podugačka. Njome će se baviti stranački politički stratezi koji se još uvijek pitaju: "Šta to, bolan, bi?". Odgovor je jednostavan: građani ovoga puta nisu glasali - oni su birali i sebi izabrali, pa kako im bude. "Djeluje glupo što se danas bošnjačkom svijetu prigovara za rezultate izbora, navodeći uobičajeni problem nacionalnog interesa" (Sejo Omeragić, "Liljan", 24.4.-1.5. 2000.)

26.4.2000.

Opštinski sud u Gračanici - najažurniji na Tuzlanskom kantonu

Među 10 opštinskih sudova na području Tuzlanskog kantona, Opštinski sud u Gračanici je po svim referatima na prvom mjestu po ažurnosti i efikasnosti. To je jedan od najvažnijih kriterija za ocjenu opšteg stanja u našim pravosudnim institucijama koje, inače, hronično boluju od neažurnosti. I po drugim kriterijima gračanički Sud odavno prednjači na Kantonu i Federaciji. Zvanične pohvale stigle su i sa Kantonalne skupštine koja se, po svom "opisu posla" redovno bavi pitanjima pravosuđa. Sude ljudi...

28.4.2000.

Nijaz Omerović, predsjednik Izvršnog odbora SDA Gračanica podnio ostavku

Ovaj poznati gračanički slikar (i direktor Bosanskog kulturnog centra) ostavku je podnio iz moralnih razloga, nakon analiziranja uzroka teškog poraza SDA na proteklm opštinskim izborima u Gračanici. Ujedno je najavio "da se u naredne 4 godine povlači u tzv. unutrašnji egzil iz javnog, društvenog, političkog i kulturnog djelovanja." Mala korist za politiku, a velika šteta za slikarstvo. U istom potezu.

28.4.2000.

Asfalt u Vranovićima

Radi se o kilometar i po asfalta kroz selo u koji je uloženo 150.000 KM. Po principu "pola-pola" (koji se, inače, sve više afirmiše u praksi) pare je obezbijedila Kantonalna direkcija za puteve i mještani Vranovića na čisto dobrovoljnoj osnovi. Kažu nije bilo klasičnog "razreza i prireza" već je pošteno dao koliko je ko realno mogao i imao, što može biti primjer za ugled. Stoga nije bilo teško donijeti odluku da se ide dalje - sve do "izlaska" na regionalni put Gračanica - Srebrenik

28.4.2000.

Konzekvence poraza: raspuštanje Izvršnog odbora SDA u Gračanici

Nakon analize uzroka katastrofalno loših rezultata na proteklm lokalnim izborima, Glavni odbor SDA na svojoj vanrednoj sjednici izglasao je niz mjera, među kojima je i raspuštanje rukovodstava (izvršnih odbora) opštinskih organizacija SDA u Gračanici, Lukavcu, Srebreniku, Kladnju, sarajevskim opštinama Novi Grad, Centar, Stari Grad, Novo Sarajevo, Foča-Ustikolina, Goražde, Jajce, Čapljina, Livno, te kantonalnih odbora Tuzlanskog, Sarajevskog i Bosanskopodrinjskog kantona - u kojima je, kako je rečeno, "SDA iznevjerila narod", a birači opomenuli i kaznili "osionu, bahatu i odnarodenu vlast". Sa predsjedničke funkcije u gračaničkoj organizaciji SDA Nijaz Omerović povukao se dva

dana prije ove sjednice. Kao da je znao za katul-ferman iz Sarajeva.

3.5.2000.

"Mladost", list učenika i radnika Mješovite srednje škole Gračanica

Pod tim nazivom izašao je prvi broj lista ove škole, koji donosi niz zanimljivih priloga iz života i rada ovog velikog vaspitno-obrazovnog kolektiva, te vrlo kvalitetne literarne radove učenika u rubrici "Perom mladih stvaralaca", među kojima se izdvajaju pjesme Amre i Azre Jahić, Azre Sokolović, Maide Imamović itd. U opširnim intervjuima rukovodioci škole (direktor Sead Korjenić, te pomoćnici direktora Tarik Nuhanović i Hasan Brkić) iznose svoje poglede na neka aktuelna pitanja obrazovno-vaspitnog procesa u školi. Zanimljiv je i poziv nekim budućim istraživačima da se pozabave historijatom srednjeg obrazovanja na području gračaničke opštine, koje, kako piše list ima dugu tradiciju. Uostalom, četrdesetogodišnica gračaničke Gimnazije prošle godine jedva da je negdje i spomenuta.

4.5.2000.

Četvrti susret prijateljstva medicinskih škola Federacije BiH u Gračanici

Ovdašnja Mješovita srednja škola, u okviru koje je i srednja medicinska i zubotehnička škola, ugostila je oko 400 učenika i nastavnika iz gotovo svih srednjih medicinskih škola s područja Federacije BiH, od Bihaća do Goražda i Sarajeva, Tuzle, Konjica, Tešnja itd. Puna dva dana trajala su sportska takmičenja i takmičenja iz stručnih predmeta koji se izučavaju u tim školama. U nezaboravnoj uspomeni ostaju mnogobrojna nova poznanstva i prijateljstva, druženje i zabava u Gračanici. Domaćini su položili još jedan ispit iz gostoprimstva. I Gračanica s njima.

10.5.2000.

"Jedini, mili, grade moj"

Pod ovim pomalo romantičnim nazivom u ovdašnjem Domu kulture učenici i nastavnici Gimnazije "Dr. Mustafa Kamarić" izveli su zanimljiv kulturno-umjetnički program, odnosno završnu priredbu u okviru obilježavanja Dana svoje škole. Posebno je uspio muzičko-poetski kolaž pjesama i lirskih iskaza o Gračanici, originalan od ideje do realizacije, u kojem su učenici vrlo nadahnuto iskazali ljubav prema svome zavičaju. Stoga treba pohvaliti autore i realizatore ovog programa - profesre: Hajrunisu Mujić, Zlatu Nežirović i Saliha Husanovića, kao i mnogobrojne mlade talente koje je publika nagradila toplim aplauzima. To su, svakako, potencijali o kojima bi ovdašnja "lokalna kulturna politika" morala više voditi računa - naravno, ako tako nešto uopšte postoji.

10.5.2000.

Senahid Šaković, kandidat za novog načelnika opštine Gračanica

To je odluka rukovodstva gračaničkog SDP, koji kao pobjednik, u novom opštinskom vijeću ima apsolutnu većinu - 16 od ukupno 30 vijećničkih mandata. Po izbornom rezultatu pripada mu i mjesto predsjedavajućeg Opštinskog vijeća na koje je kandidovao Midhata Alića, nastavnika iz Miričine. odbora SDP Gračanica.

Predstavnici ovdašnjih stranaka i "neizbježnog" OSCE-a postigli su dogovor da se "smjena vlasti" i konstituirajuća sjednica Opštinskog vijeća održi 22. maja ove godine.